

## Mbanjdingdenj:

# Vwnzva “Naz” Hawj Vunz Maezmwd

## 定典屯——“那”文化醉人的村庄

□ Lungz Senh

*Henz mbanj raemx saw faex heu gingj gyaendei.*

Lungzanh Yen Nazdung Cin Dinggyangh Cunh Mbanjdingdenj haengrengz hwnjguh aenmbanj guh-yiengh cunghab, yienghsienq aenmbanj bienqvaq hungloet, ranzranz ndaej youq ranzlaeuz moq, ciengz hau vax mong sieng daengj youq ndaw faex loeg va hom; ciengzgyaeujmax, rangh roeg comzdouh doenghgiy yenzsu vwnzva “naz” haenx, gek geij yamq roen couh venj miz aen dem aen daengloengz nding; aen hongh’iq naj ranz laeng ranz ndaem doh gomak byaekheu, yienh’ok ngaenzndang gaenxgyaek gyoengq vunzmbanj; aen Hagdangz Gungjswj ndaw mbanj, hom saw doh seiqlengq……

Dwen daengz Mbanjdingdenj, gyoijhom cix dwg mbaw “vengq mingzcoh” lwenqde de. “Cungguek gyoijhom daihvuengz”, Lungzanh Ginhsui Gunghsw h dungjswcangj Luz Yicinh dwg vunz aen mbanj neix, de doenggvaq diegdeih riuzcienj youq dangdieg aeu biucinjvaq ndaemganq gyoijhom 8.7 fanh moux, lij byaij ok douguek bae daengz Laujvoh banh hwnj aen gyoijhom gihdi miz 30 fanh moux ndeu. Ginhsui gunghsw hwnjfat hoenghvuengh, hawj vunzmbanj ndaej ndeicawq lairaeuh. Seizneix, Mbanjdingdenj reihnaz gaenq cienzbouh co hawj gunghsw h dajndaem, gunghsw h byaij diuzroen “rangh guhyiengh + giyez + hozcozse + noengzhoh”, vunzmbanj ndaej ndeicawq haujlai, gawq ndaej miz

ngaenzco souhaeuj, youh ndaej bae gunghsw h dajgoeng miz ngaenzhong lingx, caiq doenggvaq haifat lijyouz lajmbanj miz faenhoengz, saedyienh moix bi miz sam yiengh souhaeuj, bi 2014 daengx mbanj moix vunz bingzyaenz cinghsouhaeuj miz 15625 maenz.

Mbanjdingdenj depgyawj roeng-guek roensengj caeuq gizhaeujok gauhsuz goengloh, gyaudoeng bienhleih, ndaw mbanj miz 83 ranz 339 vunz, miz reihnaz 3450 moux. “Cibngeih haj” geizgan, ndaw mbanj caepguh aenranz miz funghgwz Bouxcuengh, boiqdaug gunghgung sezsih, cauxguh yienghgingj aensuen heulog daengj 35 aen hanghmoeg caeuq hwnjguh gihdi, laeb sezsih lijyouz daengj canjnieb hwnjfat 6 aen hanghmoeg, gij hanghmoeg neix dwg giyez roengzngaenz lai, vunzmbanj caezsim okrengz haengguh, geij bi gvaqbae, gij hongh’iq noengzgya daengj miz aen dem aen ranzlaeuz sam caengz haenx, baizlele daengjsoengz youq song henz roenmbanj, aen caeuq aen doxgek caezcup yinzrwd, ciengz hau vax mong saekyiengh doxdoengz gyaendei; baihnaj benq ranzlaeuz dwg aen youqndwi vwnzva gvangjczangz gvang baenz 1.33 gunghgingj haenx, gizneix daengroen sangvid, gofaex heuswd; daj gvangjczangz yawj bae, gizdieg mbouj gyae dwg aen Dinghuz gvangq 12 gunghgingj haenx, raemxhuz

sawrxenx, rumz ci raemx fubred; baihsuwx henz huz dwg benq aenbungz suenmakit hausak ndeu, baihnaj dwg doenghreih gova hoengzhoengz henjhenj ndeu, yienh’ok gij yienghsienq lajmbanj moq vwnzva daegsaek Bouxcuengh naekgywg, gyaendei yinxvunz.

Youq Mbanjdingdenj, ndaw aenranz vwnzva “naz”, baij cuengq gak cungj hongdawz dajndaem dajciengx ciuhgonq nungzminz yungh, yienghvunq haexnaz cimq ceh doekgyaj ndaem ndai gvej haex ginggvaq, hawj vunz roxyiuj gij vwnzva dajndaem Bouxcuengh gag miz haenx. Cawz aenranz vwnzva “naz” le, ranzdwkgiuz, daizheiq, gvangjczangz siengqdeu canjrin hung, gvangjczangz vwnzva “naz”, hawj vunzmbanj caeuq hekyouz miz dieg guh’angq; caemh ndaej bae luengqhongh “naz”, giuzndojfwn, giuzutngaue, giuzdoengzsim cienheu, giuzbingz, diengzseiqgok doenghgiy dieggingj neix youzbyaij guhcaemz; hekyouz lij ndaej bae ndaw suenmakdumh, suenmakit doenghgiy suenmak neix cimz mak mbaet mak. Hekyouz doenggvaq camgya gak cungj gak yiengh hozdung mizyinx, yawjgonz baijyienh “naz”, dingq gojriuz “naz”, cimz gijgwn “naz”, gamjsouh vwnzva “naz” dangdieg, dajniemh saedceij moq lajmbanj, caemh sim’angq simsoeng roxnyinh youqndwi cwxcaih.



▲ Suenva henz mbanj va yinxvunz.



▲ Aenmbanj moqsag vunz hozhaenz.



▲ Hekyouz bae Dinghuz cwxcaih vadruz.



▲ Ndaw gihdi gyoijhom ngoenzngoengz nyaengq dajsou.



▲ Luengqhongh vwnzva dem gingj ndei.

◀ Gyanghongh aenranz seuqcingh caemdingh.